

DOMENIE II «VIE PAL AN»

Antifone di jentrade Sal 65,4

Denant di te si plee dute la tiere
e al to non e cjante, o Altissim.

Colete

Diu onipotent e eterni,
che tu rezis tant lis robis dal cîl che chês de tiere,
scolte cun boncûr lis preieris dal to popul
e regalinus la pâs ai nestris dîs.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE 1 Sam 3,3-10.19

Fevele, Signôr, che il to famei ti scolte.

Da prin libri di Samuel

In chei dîs, Samuel al jere lât a pognisi tal santuari dal Signôr, là che e jere l'arcje di Diu. Il Signôr al clamà: «Samuel!» e lui al rispuindè: «Ve chi che o soi!». Al lè di buride di Eli e i disè: «Ve chi che o soi, che tu mi âs clamât». «Jo no ti ài clamât gran – dissal Eli –; torne a durmî». E lui al tornà a durmî. Il Signôr al tornà a clamâ: «Samuel!». Lui al jevà sù e al lè di Eli e i disè: «Ve chi che o soi, che tu mi âs clamât». «Jo no ti ài clamât, fi gno – dissal Eli –; torne a durmî». Samuel nol cognosseve ancjemò il Signôr e la peraule dal Signôr no i jere stade nancjemò no rivelade. Il Signôr al tornà indaûr a clamâ Samuel pe tierce volte. Lui al jevà sù e al lè di Eli e i disè: «Ve chi che o soi, che tu mi âs clamât». Alore Eli al capì che al jere il Signôr che al clamave il frut e i disè a Samuel: «Va a durmî e, se ti clamin, tu âs dí dî: Fevele, Signôr, che il to famei ti scolte» e Samuel al tornà a pognisi inte sô cove.

Il Signôr al rivà e si fermà. Al clamà compagn di chei altris viaçs: «Samuel, Samuel!» e Samuel i rispuindè: «Fevele, che il to famei ti scolte».

Samuel al cresseve in autoritât. Il Signôr al jere cun lui e nol lassà colâ abàs nuie di ce che i veve dit.

Peraule di Diu.

SALM RESPONSORIÂL dal Salm 39

R. Ve chi che o soi, Signôr, par fâ la tô volontât.

O ài metude tal Signôr dute la mê sperance,
lui si è pleât viers di me
e al à scoltât il gno berli.
Al à metût su la mê bocje une cjante gnove,
une laut al nestri Diu. **R.**

Tu no tu bacilis par sacrificis e par ufiertis,
tu mi âs vierzût pulît lis orellis!
Olocauscj e sacrificis pal pecjât no tu domandis.
Alore o ài dite: «Ve chi che o soi! **R.**

Al è scrit sul gno cont tal rodul dal libri
che la tô volontât o fasi.
Sì, Diu gno, o vœi fâle:
la tô leç le ài dentri vie». **R.**

O conti la tô justizie te grande seemblee.

Ve, jo no ten sierâts i miei lavris:
tu tu lu sâs, Signôr. **R.**

SECONDE LETURE 1 Cor 6,13-15a.17-20

I vuestris cuarps a son parts dal cuarp di Crist.

De prime letare di san Pauli apuestul ai Corints

Fradis, il cuarp nol è pe sporcjetât ma pal Signôr, e il Signôr al è pal cuarp. E Diu, che al à risussitât il Signôr, nus risussitarà ancje nô cu la sô potence.

Po no savêso che i vuestris cuarps a son parts dal cuarp di Crist? Chel che si dà dongje cul Signôr al devente un spirt sôl cun lui. Stait lontans de sporcjetât! Ducj i pecjâts che l'om al fâs a son fûr dal cuarp; machel che al fâs porcariis al pecje cuintri dal so cuarp. Po no savêso che il vuestri cuarp al è il santuari dal Spirtu Sant che al è in vualtris, che lu vês di Diu e che no si partignîs? O sês stâts comprâts a cjâr presit. Alore glorificait Diu tal vuestri cuarp!
Peraule di Diu.

CJANT AL VANZELI 1 Sam 3,9; Zn 6,68

R. Aleluia, aleluia.

Fevele, Signôr, che il to famei ti scolte.

Dome tu tu âs peraulis di vite eterne.

R. Aleluia.

VANZELI Zn 1,35-42

A vioderin là che al jere a stâ e in chê di si fermarin li di lui.

Dal vanzeli seont Zuan

Tal indoman, Zuan al jere ancjemò li cun doi dai siei dissepui. Butant il voli su Jesù che al passave, al dîs: «Ve l'agnel di Diu». I doi dissepui lu sintirin a fevelâ cussì, e a lerin daûr di Jesù. Jesù, voltantsi e viodint i doi dissepui che i levin daûr, ur dîs: «Cui cirîso?». I diserin: «Rabî (che al vûl dî 'mestri'), dulà stâstu?». Ur dîs: «Vignît e o viodarês». A lerin e a vioderin là che al jere a stâ e in chê di si fermarin li di lui. A jerin tor lis cuatri dopomisdi.

Andree, fradi di Simon Pieri, al jere un di chei doi che a vevin scoltât Zuan e a jerin lâts daûr di lui. Al cjate par prin so fradi Simon e i dîs: «O vin cjatât il Messie (che al vûl dî 'Crist')». Lu menà li di Jesù. Cjalantlu fis, Jesù i disè: «Tu tu sês Simon, fi di Zuan. Tu ti clamarâs Chefa (che al vûl dî 'Pieri')».

Peraule dal Signôr.

Su lis ufiertis

Danus la gracie, Signôr,
di celebrâ chescj misteris dispès e cun fede,
parcè che ogni volte che si fâs memorie di chest sacrifici
si colme la vore de nestre redenzie.
Par Crist nestri Signôr.

Antifone a la comunion Sal 22,5

Tu prontis denant di me une taulade
e il gno bocâl al è plen che al stranfe.

O ben: 1 Zn 4,16

Nô o vin ricognossût e crodût al amôr che Diu al à par nô.

Daspò de comunion

Met in nô, Signôr, il spirt dal to bonvolê,

par che, sostentâts cul unic pan dal cîl,
o sedin unîts intun unic amôr.
Par Crist nestri Signôr.